

565924

Mag. St. Dr.

kat. komp.

41
20

EPISTOLA

EXC. ILLMI & RMI JOSEPHI COMITIS

GARAMPII

*Archiepiscopi Berytensis, in Regno Polonia
 & Magno Ducatu Lithuania Nunti
 i Apostolici, ad Illos & Rmos*

DD. Archiepiscopos. & Episcopos.

Data Varsavia die 30. Junii

Anni 1775.

SANCTISSIMUS Dominus noster PIUS PAPA VI. habita benigne ratione precum, quæ serenissimi Regis ac Reipublicæ Poloniæ nomine, de imminuendo dierum festorum numero, qui ex Ecclesiæ præscripto vel consuetudine celebrantur, ad ipsam haud pridem pervenerunt; expensisque aliis ejusmodi postulationibus ac precibus, ad summos pontifices prædecessores suos delatis, cum relationibus ab illustrissimis & reverendissimis Regni & M. D. Lithuania archiepiscopis & episcopis hac de re alias acceptis; haud amplius differendam censuit Dispensationem, quæ illud spectat, ut populus, commodioribus sibi comparatis vitæ sustentandæ rationibus, nova hac excitetur Ecclesiæ indulgentia; atque in accuratorem ceterorum festorum dierum, quæ erunt ex præcepto colendi, observantiam alacriter feratur.

Hujusmodi igitur pro Gente Poloniæ indulgentiam Sanctitas sua ad normam ordinavit illarum, quæ locum jam habuere in partibus diocesium, quæ alienas attingunt dominationes, ne cultus diversitas in ejusdem Ritus popu-

A

pu-

1917

1963 K 1317

pulis, ad unam eandemque diocesim spectantibus, ullam parere possit, inter idiotas praefertim, confusionem vel perturbationem, & conscientiae simul sollicitudinem. Quod verò in iis locis jam laudabiliter obtinuit, ut & festivi qui retinentur dies maiori nunc celebrentur veneratione, & reliqui in pauperum redundaverint utilitatem, illud itidem a pia Polona natione summus pontifex sibi cumulate pollicetur.

Aegre tamen graviterque accepit, pravam in hoc Regno invaluisse consuetudinem, ipsimet constitutionibus synodalibus (*lib. 2. tit. de Feriis*) reprobatae, ut nundinae ac venalium rerum publici mercatus, ut plurimum, festis diebus habeantur: quod quantum christianae ipsorum observantiae obstat atque adversetur, & experientia docet, & sapienter praedecessorum suorum vestigiis inherens admonuerat s. m. Benedictus XIV. in suis literis sub annulo piscatoris die 5. novembris anni 1745. datis, quarum initium: *Ab eo tempore*. Ceterum, ex quo ejusmodi pontificiae dispensationes concessae Austriacis ditionibus fuere, oculatus egomet ipse testis fui, quanta & quam singulari vigilantia festorum dierum sanctificationi consultum fuerit, eorumque proinde exactior observantia accreverit; quam severe nundinae & mercatus omnes interdican- tur; imo nullae penitus officinae vel tabernae vendentium vel ementium commodo prostant, ac certae dumtaxat, exque paucae praefinitae sint horae (quae nempe sacris exercitationibus, ac divinis vacant officiis), quibus vendere atque emere liceat res quotidiano victui omnino necessarias: sed hoc ipso intervallo omnes in officinis ipsis vel tabernis conventus, con-

vivia; ac ludicra quæque & profana, omnino prohibentur. Præclarum sane, ac nunquam satis laudandum. Augustorum in Deum pietatis documentum!

Hoc igitur proposito exemplo, nihil est, quod a nationis etiam Polonæ pietate sibi sanctissimus Pater non polliceatur: atque hoc ipsum mihi plane mandavit illustrissima & reverendissima Dominationi Vestræ non minus, quam ceteris collegis suis, diserte significandum, ut dum novæ pontificiæ dispensationis beneficium populis, eorum fidei curæque commissis, erunt promulgaturi, iisdem eo ipso tempore iustissima ac piissima Sanctitatis suæ consilia ac monita patefaciant; adeo ut pastoralis sollicitudo nullis parcat rationibus, quibus possint tales abusus, ubi invaluerint, coerceri. Hinc unumquemque moneant, in Domino hortentur, excitentque ad exactam hanc dierum festorum observantiam; ac si opus est, adversus transgressores opem etiam implorent secularis auctoritatis, ut qui Ecclesiæ, conscientiæ causa, obsequi detrectaret, poenarum saltem metu refrænetur & adigatur.

Audivit etiam sanctissimus Dominus noster, eam esse alicubi *Cmethonum* seu glebæ adscriptorum conditionem, ut vix ullum hebdomadæ diem ab operis domino præstandis exceptum habeant; vel eas statim diebus ita assignatas, ut nisi Festum aliquod iisdem diebus inciderit, non possint ab operibus domino præstandis se abstinere. Verum ea est Sanctitatis suæ fiducia, quam in hujus nationis religione, pietate & æquitate locavit, ut sibi in animum nequeat inducere, futuros esse dominos, qui miseros homines adigant ad de-

ferendas festis diebus abrogatis eas operas, quas, stante ipsorum dierum præcepto, exigere ab iisdem usque adhuc non potuerunt. Nihilominus ad magis magisque bonorum animos excitandos, operæ pretium sanctissimus Pater arbitratur, per sacrorum pastorum vocem, & dominos, & servos admonere, se novo huiusmodi beneficio illud præcipue spectasse ac sperasse futurum, ut eorum, qui in sudore vultus sui panem comedant, indigentia commodius provideretur: optare propterea, vehementerque petere, ut cum domini nullum opus aut ministerium diebus festis, qui ex præcepto vel consuetudine servabantur, a servis suis alterutri conditioni ut supra obnoxiiis, exigere usque adhuc potuerint; ita neque in posterum repetant: etsi eorundem dierum servandorum præceptum, ex benigna erga pauperes pontificia miseratione, abrogetur.

Hæc igitur habui ex Sanctitatis suæ supremis mandatis illustrissimæ Dominationi Vestræ ac ceteris collegis suis, novæ pontificiæ indulgentiæ participibus, communicanda. Doctrina, studio atque obsequio erga Ecclesiæ caput suo vehementer confusus, dubitare nullo modo possum, quin illustrissima Dominatio Vestra singulis cujuscunque status personis, spirituali curæ suæ subjectis, manifestam Sanctitatis suæ mentem non sit declaratura; easque etiam ad ejus executionem excitatura iis hortationibus & monitis, quæ tum perspecta sua prudentia, tum rei argumentum atque ipsæ apostolicæ literæ sanctissimi Domini nostri, illustrissimæ Dominationi Vestræ abunde suppeditabunt. Hæc autem omnia in edicta referre juvabit, quæ vulgo *Processus* dicuntur,

S S O S

eur, quibus populo suo novam pontificiam dispensationem denuntiabit. Omnes autem parochos, verbi Dei prædicatores, & confessarios, tam sæculares, quam regulares moneat, ut populos diligenter, uti opus est, instruant, tum de ratione, qua dies festi sanctificari debeant, quo ardore, quo pietatis studio, qua frequentia divinis officiis, sacris concionibus, & christiana doctrinæ institutionibus; tum denique de sanctissimi Patris mente & consiliis, quæ supra in diligentem festorum dierum sanctificationem adimplenda declaravi, si populi, Dei & Ecclesiæ præcepto satisfacere, ac debitæ erga sanctissimum Patrem obedientiæ meritis, gratiæ suæ pontificiæ beneficio frui perpetuo voluerint.

Atque interim studium & observantiam meam illustrissimæ & reverendissimæ Dominationi Vestræ deferens, me esse ex animo profiteor &c. Datum Varsaviæ die 30. junii Anni 1775.

EPISTOLA ALTERA

*Ad RR. PP. Superiores Provinciales
Ordinum Regularium in Regno Po-
loniæ & Magno Ducatu Lithua-
niæ existentium.*

EX adjuncto epistolæ exemplo, quam ad illustrissimos & reverendissimos archiep. & episcopos Regni Poloniæ & magni ducatus Lithuanicæ scribo, ut eis mentem sanctissimi Do-

6
CLES O CLES
Domini nostri PII PAPÆ VI, præcipuasque
significarem rationes, quibus maxime permo-
tus, ad enixas serenissimi Regis ac Reipubli-
cæ preces, de imminuendo Festorum numero
dispensationem benigne concessit, Vestra cri-
am Paternitas plane cognosceret, quid ipsi &
religiosis provinciæ suæ viris faciendum sit,
quidve populis inculcandum, ut se & ad San-
ctitatis suæ consilia ac voluntatem confor-
ment, & monitis, cohortationibus ac manda-
tis obsequantur, quæ proinde desiderari sa-
crorum pastorum prudentia ac sollicitudo mi-
nime patierur.

Mihi vero, pro ea peculiari cura & studio,
quo ex mei ministerii munere Regulares Or-
dines ex animo complector, nihil modo aliud
superest addendum, quam ut zelum, doctri-
nam ac prudentiam religiosarum familiarum
magis magisque excitem ad populos ea recte
edocendos, quæ ad iustam legitimamque fe-
storum dierum, quibus adnexum supererit
præceptum, pertinent sanctificationem; quæ-
que fuerint sanctissimi Patris rationes, ut
reliquorum Festorum imminutionem indulse-
rit. Cum enim ita provide consuluerit, ut
jacturam illam compensent, quam in compa-
randis necessariis vitæ subsidiis patiebantur ex
præcepto, quod pluribus infra annum diebus
erat adjunctum, fore judicavit, ut omnes
forus temporales curas & cogitationes depo-
nente diebus, qui supersunt, dominicis &
fest. mysteriorum Christi, beatæ Mariæ Vir-
ginis atque eorum Sanctorum, qui in pontifi-
ciis libris enunciantur, in hisque ad animarum
suarum salutem tantummodo incumbere-
rent.

Hinc verò inferendum neutiquam videtur,
sum-

summum Pontificem ad hos dumtaxat dies curam circumscribere, quæ de propria sanctificatione, de omnipotentis DEI cultu, deque beatæ Mariæ Virginis ac Sanctorum veneratione inesse cuilibet debet. Hoc enim studio affici quotidie & continenter Christiani delem oportet, qui tenetur orare *semper & non desicere*; quinimo quæ facit, licet ad communes vitæ actiones ea pertineant, omnia ad DEI gloriam, honorem & cultum referre. Verumtamen quædam externæ actiones, quædam christiana pietatis exercitationes ad festivos potius dies reservantur, in quibus, sepositis omnibus sæcularibus curis, animum possit attentius colligere; atque hinc, si quid antea deliquerit, agnoscere & corrigere, novumque eodem tempore hominem induere in justitiam & sanctitate veritatis.

Videte, edicit Dominus, ut sabbatum meum custodiat, quia signum est inter me & vos in generationibus vestris, ut sciatis, quia ego Dominus, qui sanctifico vos (Exodi cap. XXXI. v. 13). Ideoque dominico die a labore terreno cessandum, at omni modo orationibus insistendum, ut quod negligent per sex dies agitur, per diem resurrectionis dominicæ precibus expietur: hæc s. Nicolaus I. pontif. max. in Respons. ad Bulgaros cap. 10. (Concil. 10. VIII. col. 122.). Debet ergo, ut optime notat Antonius (Summa Theolog. Par. II. tit. X. cap. VII. §. 4.) die festo insisteri operibus spiritualibus orationis, meditationis, alitiorum divinorum, lectionis, & eleemosynarum & huiusmodi: & inter cetera debent homines vacare compunctioni & contritioni peccatorum, recogitantibus quæ egerunt aliis diebus, in quibus fuerunt occupati; dicitur enim Levi-
tici

Sabbatum

tici cap. XVI. sabbatum requiectionis est: affligetis animas vestras; scilicet per contritionem, secundum Originem.

Hæc omnia ac multo alia plura, perspecta quidem Paternitati Vestræ ac religiosis viris, haud æque tamen cognita idiotis sunt & populis, qui Dei & Ecclesiæ praeceptorum vim non satis sentientes, se festorum dierum sanctificationem adimplevissent arbitrantur, quod sacro assent, atque ab omni servili opere vacent: dum tamen quod reliquum est diei, in otio terunt, in comestationibus, in ebrietatibus, in impudiciis. Sancti Patres majores nostri nunquam non destiterunt hujusmodi corruptæ & fragilis humanæ naturæ vitia coercere, modo legibus, modo hortationibus. *Idne est, o christiani,* aiebat s. Cyrillus Alexandrinus (*Lib. VIII. cap. V. in Johannem*) *celebrare diem festum, indulgere ventri, & inconcessis voluptatibus habenas laxare? Diebus ad exercenda servilia opera concessis unusquisque suo intentus est operi, & abstinet a crapula, ludis, & vanitatibus: diebus autem festis passim concurritur ad canponam, ad ludos, ad spectacula, ad choreas, in derisionem divini numinis & diei pravariationem? Quare apposite ad rem nostram* Augustinus monebat: *Judei serviliter observant diem sabbati ad luxuriam, ad ebrietatem. Quanto melius foemina eorum lanam facient, quam illo die in mentianis saltarent! Absit fratres, ut illos dicamus observare sabbatum.* *Tract. III. in Johannem §. 20. Tom. III. Pa. 2. pag. 311. edit. Parisien.)*

Absit igitur, ne christiani Judaicæ nequitiae imitatores videantur. Attamen, si attentius consideremus, norne apud multos tota eorum oc-

cupa-

cupatio in festis est circa corpus? quia scilicet non Deo, sed sibi vacant, ventri & damoni.... Mulieres vacant, & non parum temporis expendunt in se ornando ad capiendas animas: famuli & famulae ad preparando cibos accuratius solito: mercatores ad faciendos suos computos & ratiocinia, ad scribendum libros & literas: inferioris conditionis homines ad audiendum de palatinis, vel spectacula vana: nulla cura filiorum & familia, sed omnes liberi dimittuntur ad faciendum mala; & quod cum multo labore per hebdomadam lucrati sunt, in festis, in tabernis & ludis, non in eleemosynis expendunt. Quae animadvertens S. Antoninus (loc. cit.) quaestionem sibi proposuit utrum quis, abstinendo se a criminalibus & operibus manualibus, per hoc solum quod non vacat divinis, nisi audiendo Missam, vel non audiendo quia non potest, sed per totum Festum solatiatur & ratiocinatur de otiosis, peccet mortaliter? Et respondet: videtur quod sic; quia maxime cadit sub precepto, quod est de intentione legislatoris. Sed ad hoc intentio legislatoris hujus precepti est, ut varetur Deo. Talis autem non vacat Deo: quia etsi audit Missam, illud valde modicum est respectu totius diei; & modicum pro nibilo reputatur..... Non vacare Deo pro majori parte diei peccatum est. His & hujusmodi alijs rationibus bene perpensis cardinalis Cajetanus, vir inter theologos valde gravis, serio fideles admonuit, quod licet cum abstinencia a servilibus, solius Missae cultus sufficiat in Festo ad evitandum peccatum mortale; tenentur tamen fideles diem expendere in divinis laudibus, saltem cundo ad praedicationem & ad vespas. Unde, qui post Missam festos dies vane consumunt, luden-

iendo, jocando, otioseque vagando, aut venando, spectaculis intendendo, licet ex ipsis operibus, utpote non servilibus, mortale non incurrant; ex omissione tamen divini cultus, ad quem festa instituta sunt, graviter peccant: quia non reddunt, quæ sunt Dei, Deo; & quia, quantum est in se, ridiculo exponunt christiana festa, juxta illud: viderunt eam hostes, & deriserunt sabbata ejus; Et hoc præcipue tangit viros graves, & majores dominos: ceteri namque eos imitantur.

Quos igitur supra memoravimus abusus, si qui irrepsere, ii sunt, nostra præcipue opera corrigendi; hujus generis errores, sunt nobis in omni patientia & doctrina refellendi, ac fideles omnes sanis doctrinis instruendi, quibus ipsi inhæreant oportet in re tam gravi, quæ animarum suarum salutis potissimum interest: ne falso sibi suadeant, magnam se assumpsisse religionem, quod Festorum numerum ultra Ecclesiæ præceptum sponte sua multiplicent, dum interim eorum, qui ex præcepto retinentur, accuratam negligunt observantiam. Quod si qui facerent, merito corripere eos Deus per os prophetarum suorum: *dispergam super vultum vestrum stercus solemnitatum vestrarum* (Malachiæ cap. II. vers. 3.). *Neomenias & sabbatum & festivitates alias non feram; iniqui sunt cœtus vestri; calendæ vestras & solemnitates vestras edidit anima mea; facta sunt mihi molesta; laboravi sustinens* (Isaiæ cap. I. vers. 13.). *Quæ est hæc res mala quam facitis, & profanatis diem sabbati?* (2. Esdr. XIII.)

Voluntas igitur sanctissimi Patris ea quidem minime est, ut fideles ipsi a religionis ac pietatis actibus, vel a Sanctorum veneratio-

ne in abrogatis Festis arceantur; sed dum maximum opus antea interdictum iisdem liberaliter indulget, ut proprijs ac domesticis commodius consulant necessitatibus, vult etiam ac præcipit, ut festi dies, qui sunt ex præcepto colendi, sobrie, iuste ac pie transigantur.

Huc autem referri maxime debet concionatorum & confessoriorum studium ac vigilantia. Cum enim ministri Christi sint, & dispensatores mysteriorum Dei, fideles non invenirentur in eorum ministerio, nisi filios, qui eorum fidei curæque se committunt, uti spirituales decet patres, recte instruerent, assidue monerent, ac opportune corrigerent. Quare, etsi mihi dubium non sit, quin ipsi hæc omnia populis opportune inculcare usque adhuc non destiterint; nunc tamen, ex quo talis incidit opportunitas pontificiæ promulgandæ dispensationis, id faciendum diligentius ac frequentius omnino videtur, neque desistendum, quoadusque populus necessaria, quæ sunt, recte addiscat, calleat, & adimpleat.

Itaque operæ pretium ex officio suo paternitas Vestra faciet, si concionatoribus & confessorijs provinciæ suæ monita ejusmodi frequenter graviterque commendet & inculcet. Pari vero sedulitate curandum est, ne ab ejusmodi, quæ concionatoribus & confessorijs inesse debet sollicitudine, ceterorum Religiosorum ratio & actiones ullomodo discrepent. Singuli enim, ac nos præcipue, qui Ecclesiæ mancipati sumus, ad animarum salutem ac sanctificationem, cogitationes, curas & operam, secundum propriam virtutem, conferre tenemur. Qui enim plura talenta acceperit, ea omnia diligenter negotiari debet, ut, veniente domino, concredita sibi summam, utique cum

usu

usuris, reddere ei possit. Non enim excusatur, qui, cum unum talentum acceperit, abiens fodit in terram & abscondit pecuniam domini sui. Inutilem servum huiusmodi præcepit Dominus in tenebras ejici exteriores.

Maximam autem apud sæculares & idiotas vim habere poterit Superiorum localium exemplum in ecclesiæ bonorum, si quæ habent, administratione. Quæ de servis vel adscriptitiis ex sanctissimi Patris voluntate in memorata ad illusterrimos & reverendissimos episcopos epistola admonui, ea ipsi accurate exequantur. *Quod si is, qui suorum non habet curam, Fidem abnegavit & est infideli deterior; qui suos etiam violat, ubi constituetur? cum quibus assistet? (s. Johannes Chrys. homil. 53. in Matth.)* Quis autem post eos, quos jura sanguinis jungunt, magis *suis* cuique est, quam servus domino? Nam, si inter eos status & fortunarum impar est conditio, debet tamen utrosque æqualis caritas jungere, quos junxit non modo æqualis natura, sed & æqualis vocatio in Christo Jesu. Apud Deum enim & Dominum nostrum, ut ait Apostolus, *non est servus, non est liber; omnes nos unum sumus in Christo Jesu* (ad Galat. III. vers. 28.); quia *sive servi, sive liberi, omnes in unum corpus baptizati sumus, & omnes in uno spiritu potati sumus...* Imo corpus Christi sumus & membra de membro. Si quid igitur patitur unum membrum, *compatiuntur omnia membra* (1. ad Corinth. cap. XII.) Servos igitur nostros diligamus, *non verbo, neque lingua, sed opere & veritate* (1. Joh. cap. III.) Porro unusquisque quodcumque fecerit bonum, hoc recipiet a Domino, *sive servus, sive liber; & vos domini eadem facite illis (servis), remittentes minas, scientes,*

res, quod & illorum & vester dominus est in ca-
lis, & personarum acceptio non est apud Deum
(ad Ephes. cap. VI.)

Insuper, cum validiora sint exempla quam
verba, & plenius sit opere docere, quam voce
(s. Leo Serm. de S. Laurent.), studiose in-
vigilent Superiores, ut quod ad eos spectat,
nihil in executionem eorum, quæ summus
pontifex monenda mandavit, desiderari con-
tingat; statuuntque hac in re obsequii, & obe-
dientiæ Jesu Christi Vicario debitæ, primum
ac singulare documentum. Præcaveant igitur,
ne in Festis, quibus adjunctum superest
præceptum, quidquam in suis locis vel fundis
peragatur, quod eorum sanctificationi adver-
seretur, ne in Religiosorum locis, renovari con-
tingat profanationes, de quibus Simon archi-
episcopus Cantuariensis in synodo Machfelden-
si anno 1332. graviter conquerebatur: Quod
in electorum Dei receptum erat honorem, con-
versum est in blasphemiam, & abominationem;
dum videlicet conventicula negotiationis & alia
exercitia illicita diebus hujusmodi potissime in-
geruntur; quod vero ad devotionis parabatur
compendium, in dissolutionis erigitur cumulum;
dum in ipsis festivitibus taberna colitur potius,
quam ecclesia; comessationes & ebrietates ube-
rius abundant, quam lacryma & orationes.....
Tantumque solemnitates ipsæ ad profanationis &
perversitatis exercitium gratis fuerint institu-
tæ! (Concil. Tom. XI. col. 1789. edit. Lab-
beanae.)

Cum vero nullo tempore destiterit Ecclesia,
quin mercatus & nandinas, quæ diebus festis
agerentur, reprobaverit, caveant præcipue Re-
ligiosi, ne in eorum locis ecclesiasticæ hujus-
modi sanctiones negligi videantur. In iis igi-
tur,

tur, non modo mercatus & nundinæ non per-
mittantur, verum etiam rusticis & vicanis,
qui ex eorum pendent imperio, quominus eas
alibi frequentent, severe interdicitur, & ad
iussu adimplenda modis omnibus alliciantur.
Comperta omnibus esse debent, quæ diversis
temporibus & locis his de rebus sanctæ decre-
verunt Ecclesiæ, & maxime in Conciliis Tu-
ronensi III. & Arelatensi VI. anni 813., To-
letano an. 1473., Mediolanensi I. an. 1505.,
III. an. 1573., & VI. an. 1579; Narbonensi
an. 1551., Rothomagenfi an. 1581, Rhemenfi
& Burdegalenfi an. 1583. Vobis autem ante
oculos præcipue habendæ sunt decretales epi-
stolæ summorum pontificum s. Pii V. *Cum pri-
mum* & Benedicti XIV. *Ab eo tempore*; atque
synodales constitutiones provinciæ vestræ Gne-
sensis: quarum omnium ad executionem præsto
vobis ubique erit gratia & auctoritas illustris-
simorum hujus Regni & magni ducatus Li-
thuanie episcoporum, qui in eam rem curas
& sollicitudines suas omnes impendent.

Tabernæ vero in Religiosorum prædiis aut
pagis prorsus claudantur; neque ullam per-
mittatur convivium aut compotatio in domo
parochiali seu religiosa, ac multo magis in
coenobiis: uno verbo ab Regularium exemplo
discant sæculares omnes & intelligant, sum-
mi pontificis atque episcoporum consilia &
monita dura minime esse, imo perfici facile
posse, modo spiritu Dei, ac salutis anima-
rum zelo agamur. *Honorasti martyres, aje-
bat s. Johannes Chrysostomus, dum adfuisti,
dum audivisti, dum studium præ te tulisti:*
honora etiam illos modeste domum recedendo;
ne quis ubi te parum decore gerentem viderit
*in popina, te non propter martyres venisse di-
cat;*

cat, sed ut vitium augeres, ut improba cupiditati servires. Si ergo postquam ad martyres accessisti, postquam hinc discesseris, ebrietati vacaturus es, melius est, ut domi maneas, nec indecore te geras, neque martyrum solemnitatem probro afficias, neque proximo sis offendiculo, neque mentem obsideas, neque peccata tibi accumules (Homil. in martyres tom. II. col. 668. edit. Monifauconii.)

Contra vero si ipsi religiosi viri, qui propter eorum vocationem ad perfectiora quæque assequenda adstringuntur, quique peculiari obsequii vinculo sanctæ apostolicæ Sedis se devinctos profitentur, si inquam desides se ac segnes ostenderent ad ea exequenda, quæ ab eadem sancta Sede proponuntur & injunguntur; neque vellent non solum proprio exemplo ceteros anteire, sed, quod absit, cum rudibus populis se commiscere non dubitarent: ita ut non jam sanctificare Festa, uti decet & oportet, sed profanare viderentur; quid inde, quæso, consequeretur, nisi Dei offensio, major errorum propagatio, Ecclesiæ dedecus, atque ipsorum denique regularium Ordinum contemptus & abjectio?

Ex his igitur, ne quidquam forte contingat, præveniendam mature censui Paternitatem Vestram, ut de omnibus religiosas sibi subjectas familias diligenter præmoneat. Hoc autem potissimum non ideo animadverto, quod dubitem fore quemquam, qui & consilio & voce & exemplo suo ad meas, vel potius supremi Ecclesiæ Capitis ac sacrorum pastorum cohortationes non se alacriter conformet; sed quod video, si quid contra vel culpa vel negligentia unius vel alterius Religiosi accideret, quo sæculares homines offenderentur, id non solum

Iam illi adscriptum imputatumque iri, sed etiam, per summam licet injuriam & iniquitatem, universæ ejus Congregationi, imo cunctis quoque Ordinibus regularibus & ecclesiasticis: ac si in corpus & collegium jure possint ea culpa & crimina transferri, quæ unius aut alterius membri propria fuere.

Hæc habui quæ hoc in argumento Paternitati Vestra, pro debita apostolicis mandatis obedientia, meoque erga Ordinem suum studio significarem. Hæc autem epistola in singulis legatur coenobiis, Fratribus in unum congregatis, atque iis, qui literas nesciunt, vulgari idiomate explicetur. Conclonatoribus vero & confessoribus in promptu semper sit, ut nullam omittant occasionem, qua salutaria monita atque ea omnia, quæ supra innui, insinuent & inculcent. Interea Paternitati Vestrae fausta omnia ac salutaria ex animo apprecor &c.
Dat. Varsaviæ die 30. Junii an. 1775.



Biblioteka Jagiellońska



stdr0023000

